



PENILAIAN SEMULA ASMAUL HUSNA MENURUT IBN HAJAR

(Review of the Beautiful Names of Allah According to Ibn Hajar)

Wan Kamal Nadzif Wan Jamil¹, Roshimah Shamsudin², Norazmi Anas³, Shahril Nizam Zulkipli⁴,
Arnie Adnan⁵

^{1,3,4} Akademi Pengajian Islam Kontemporari, Universiti Teknologi MARA

² Universiti Sains Malaysia

⁵ Sekolah Kebangsaan Iskandar Perdana, Seri Iskandar, Perak

Abstract

Debates regarding the beautiful names of Allah has sparked off since the early age of Islam until now. Only three narrations that counting these Names which were narrated by al-Tirmidhi, Ibn Majah and al-Hakim. Other narrations only quote that the almighty God has 99 beautiful names without counting and specify it. Ibn Hajar was among the early scholar who has criticised narrations that specifically counting these names. By using the comparative narration approach and analysing each of these narrations the objective of study is to study similarities and differences between these names. It was discovered that all the narration counting the names is not originated from the Prophet but an opinion (ijtihad) from the narrator himself that has been inserted (mudraj) into the hadith. 27 names should be adjusted according to Ibn Hajar al-‘Asqalani.

Kata Kunci: Beautiful names; hadith; mudraj; narration; Ibn Hajar.

Article Progress

Received: 22 July 2021

Revised: 20 October 2021

Accepted: 17 November 2021

*Corresponding Author:

Wan Kamal Nadzif Wan Jamil.

Akademi Pengajian Islam Kontemporari, Universiti Teknologi MARA

Email:

norazmianas@uitm.edu.my

PENDAHULUAN

Nama-nama Allah yang indah atau Asmaul Husna merupakan hitungan nama yang merujuk kepada zat Allah SWT. Masyhur dalam dunia Islam dan masyarakat Melayu 99 Asmaul Husna yang bersumberkan sebuah hadith riwayat al-Tirmidhi. Terdapat dua riwayat lain yang menghitung nama-nama ini iaitu riwayat Ibn Majah dan al-Hakim. Riwayat yang lain seperti al-Bukhari dan Muslim hanya menyebut bagi Allah SWT itu 99 nama tanpa menghitungnya satu persatu. Nama-nama yang terdapat dalam al-Quran bilangannya tidak mencapai 99. Berdasarkan kajian Ibn Hazm (m.456H) terdapat 68 nama sahaja (Ibn Hazm, 1352H). Oleh sebab itu para ulama sejak zaman dahulu berijtihad mencari nama-nama ini dalam hadith-hadith Nabi SAW. Al-Quran menyebut Asmaul Husna pada empat tempat iaitu al-A‘raf, ayat 180, al-Isra’, ayat 110, Taha, ayat 8 dan al-Hasyr, ayat 24. Hadith yang menghitung bilangan nama-nama ini hanyalah hadith Abu Hurairah yang diriwayatkan oleh al-Tirmidhi (m.279H), Ibn Majah (m.273H) dan al-Hakim (m.404H). Manakala lebih 50 riwayat yang bersumberkan hadith Abu Hurairah dalam kitab-kitab hadith menyebut bahawa bagi Allah SWT itu 99 nama tanpa menghitungnya. Antaranya riwayat al-Bukhari dan Muslim bahawa Rasulullah SAW bersabda: “*Sesungguhnya bagi Allah itu 99 nama, seratus nama melainkan satu. Sesiapa yang dapat menghitungnya dia masuk ke dalam syurga*” (Al-Bukhari, 2004 & Muslim, 2003).

Mudraj Dalam Hadith Asmaul Husna

Menurut al-Ghazali dan Ibn al-‘Arabi hitungan nama-nama ini merupakan ijtihad para perawi untuk menyempurnakan hadith *marfu‘* yang menyatakan bagi Allah SWT 99 nama (Ibn Hajar, 1992). Kemasukan lafaz tambahan yang terhasil daripada ijtihad perawi ini dipanggil *mudraj* dalam ilmu hadith. *Idraj* atau lafaz tambahan sesuatu matan hadith diriwayatkan bersama-sama hadith bertujuan untuk memberi penerangan atau huraian ketika meriwayatkan hadith. *Idraj* boleh berlaku ketika perawi

hendak menerangkan hukum hakam hadith atau memberi makna lafaz hadith (*gharib al-hadith*) atau mensyarahkan sesuatu hadith. Kewujudan *idraj* dapat diketahui apabila ia dijelaskan dalam riwayat yang lain, penjelasan oleh ahli hadith, pengakuan perawi itu sendiri atau mustahil lafaz tambahan tersebut daripada kalam Nabi SAW (Mahmud al-Tahan, t.th.). Contoh *idraj* ialah seperti riwayat al-Khatib dalam hadith: “*Sempurnakanlah wuduk, celakalah tumit-tumit (yang tidak sempurna basuhan) dengan azab api neraka.*” Riwayat al-Bukhari menjelaskan bahawa lafaz ‘Sempurnakanlah wuduk’ ialah kalam Abu Hurairah manakala lafaz ‘Celakalah tumit-tumit dengan azab api neraka’ ialah hadith Nabi Muhammad SAW (Abu al-Laith, 2005).

Oleh sebab itu tidak sabit hitungan nama Asmaul Husna sebagai perkataan Nabi SAW (Ibn Hajar, 1992). Ulama hadith membuat kesimpulan riwayat yang menghitung nama Asmaul Husna ialah *da’if* dan ia merupakan penyempurnaan kepada hadith *marfu’* yang sahih iaitu bagi Allah 99 nama tanpa menghitungnya satu persatu. Al-Quran menjelaskan bahawa Allah SWT mempunyai nama-nama yang mulia dan diperintahkan hambaNya berdoa dengan nama-nama itu. Hadith yang sahih menjelaskan bahawa jumlah nama yang mulia itu 99 lalu dibukakan pintu ijtihad untuk mencari nama-nama tersebut kepada kaum muslimin. Antara mereka yang berijtihad menghitungnya ialah al-Walid b. Muslim melalui riwayat al-Tirmidhi, ‘Abd al-Malik b. Muhammad melalui riwayat Ibn Majah dan ‘Abd al-‘Aziz b. Husain melalui riwayat al-Hakim. Asmaul Husna dalam riwayat al-Tirmidhi ialah 98 nama, Ibn Majah 101 nama dan al-Hakim 94 nama. Walaupun terdapat riwayat lain yang menghitung nama ini seperti al-Tabarani, Ibn Hibban, Ibn Khuzaimah dan al-Baihaqi namun semua sanadnya bersambung kepada salah seorang daripada tiga perawi ini. Maka kajian kritik sanad akan menumpukan kepada riwayat ketiga-tiga perawi ini.

Jadual 1: Riwayat Yang Menghitung Asmaul Husna

Bil.	Kitab	Jumlah Nama	Nama Berulang
1	<i>Sunan al-Tirmidhi</i>	98	- tiada
2	<i>Sunan Ibn Majah</i>	101	2
3	<i>Mustadrak al-Hakim</i>	94	1
4	<i>Fath al-Bari Ibn Hajar</i>	101	1

Selain daripada *illah mudraj*, riwayat yang menghitung Asmaul Husna dikritik kerana nama-nama ini saling bercanggah di antara satu sama lain (*idtirab*). Al-Walid b. Muslim meriwayatkan daripada gurunya Syu’aib 98 nama seperti dalam riwayat al-Tirmidhi. Namun ketika al-Walid meriwayatkan daripada gurunya Zuhair terdapat beberapa nama yang digugurkan lalu diganti dengan nama yang lain (Ibn Hajar, 1992). Ulama hadith menyatakan al-Walid menghitung nama ini daripada guru-gurunya dari kalangan ahli hadith. Oleh sebab itu riwayat al-Walid dilihat berbeza-beza berdasarkan ijtihadnya namun yang masyhur sampai kepada kita ialah melalui riwayat al-Tirmidhi. Contoh nama yang bercanggah ialah *al-Qabid* dan *al-Basit*, al-Walid menggantikannya dengan *al-Qa’im* dan *al-Da’im* seperti riwayat al-Tabarani. Beliau menggantikan nama *al-Rasyid* dengan *al-Syadid*, nama *al-A’la*, *al-Muhit*, *al-Malik* dengan *al-Wadud*, *al-Majid*, *al-Hakim*. Dalam riwayat Ibn Hibban, al-Walid menggantikan *al-Rafi’* dengan *al-Mani’*, dalam riwayat Ibn Khuzaimah beliau gantikan *al-Hakim* dengan *al-Hakim*, *al-Qarib* dengan *al-Raqib*, *al-Mawla* dengan *al-Wali*, *al-Ahad* dengan *al-Mughni*. Manakala dalam riwayat al-Baihaqi beliau gantikan *al-Muqit* dengan *al-Mughith* (Ibn Hajar, 1992). Menurut Ibn Kathir, hitungan nama-nama ini dalam riwayat hadith ialah satu bentuk *idraj (mudraj fi al-hadith)*. Para huffaz dari kalangan imam hadith telah sepakat bahawa hitungan nama-nama Allah SWT merupakan ijtihad daripada perawi yang dimasukkan menjadi sebahagian hadith Nabi SAW (Al-Amir al-San’ani, 1960).

Riwayat al-Tirmidhi daripada al-Walid b. Muslim

Asmaul Husna melalui riwayat ini ialah yang paling masyhur di dunia Islam. Memandangkan nama dalam riwayat al-Tirmidhi hanya berjumlah 98 nama, ditambah satu lagi iaitu *al-Ahad* untuk

melengkapkannya menjadi 99. Nama *al-Ahad* sebenarnya terdapat dalam riwayat Ibn Majah, al-Hakim dan Ibn Khuzaimah bukannya al-Tirmidhi. Hadith Abu Hurairah riwayat al-Tirmidhi berpunca daripada perawi al-Walid b. Muslim (m.195H) dari generasi tabi tabiin pertengahan. Al-Walid b. Muslim seorang perawi *thiqah* namun kerap melakukan *tadlis* (Ibn Hajar, 2004). Riwayat al-Tirmidhi dikritik kerana kecacatan (*'illah*) yang disebabkan oleh *tadlis*. Al-Tirmidhi selepas meriwaykannya, memberi isyarat bahawa hadith ini *gharib* menunjukkan ia diriwayatkan secara berseorangan tanpa sanad sokongan daripada sanad sahih lain. Hukum *gharib* oleh al-Tirmidhi ini bermaksud *da'if* kerana *'illah tadlis* daripada perawi Safwan dan al-Walid (al-Albani, 1991).

Safwan b. Salih (m.238H) ialah murid yang meriwayatkan daripada al-Walid b. Muslim. Walaupun Safwan seorang yang *thiqah* namun dikritik *mudallis* seperti gurunya al-Walid (Ibn Hajar, 2004). Ibn al-Wazir al-Yamani menyatakan perawi al-Walid seorang *mudallis* yang banyak melakukan *tadlis* termasuk daripada perawi pendusta. *Tadlis al-taswiyah* berlaku ketika al-Walid mengambil hadith daripada Syu'aib b. Abi Hamzah, beliau menggugurkan nama guru Syu'aib yang mengambil hadith daripada Abu al-Zinad. Lalu kelihatan seolah-olah sanad itu daripada al-Walid daripada Syu'aib daripada Abu al-Zinad sedangkan di antara Syu'aib dan Abu al-Zinad terdapat perawi lain. Perawi lain ini dikhuatiri perawi yang lemah (*da'if*) atau pendusta (*kadhdhab*). Maka perawi yang kerap melakukan *tadlis* (*kathir al-tadlis*) perlu berhati-hati menerima periwayatannya walaupun dia meriwayatkan dengan cara bersambung iaitu *haddathana* atau *sami'tu*. Sanad ini juga dikritik kerana perawi *thiqah* lain yang meriwayatkan daripada Abu al-Zinad tidak menghitung nama-nama ini seperti riwayat al-Bukhari, Muslim termasuk al-Tirmidhi yang meriwayatkan daripada Sufyan b. 'Uyainah daripada Abu al-Zinad (Ibn al-Wazir, 1994).

Al-Hakim mengkritik sanad ini kerana al-Walid berseorangan (*tafarrud*) meriwayatkan daripada gurunya Syu'aib mengenai hitungan nama Asmaul Husna. Sedangkan murid-murid Syu'aib yang lain seperti Bisyr b. Syu'aib, 'Ali b. 'Ayyasy dan Abu al-Yaman dalam hadith Asmaul Husna tidak meriwayatkan hitungan nama-nama ini. Kata al-Baihaqi, berkemungkinan hitungan nama-nama ini sama ada daripada al-Walid sendiri atau al-Walid meriwayatkan daripada seorang perawi lain daripada gurunya Syu'aib. Atas dasar inilah al-Bukhari dan Muslim tidak meriwayatkan hitungan nama Asmaul Husna dalam kitab *Sahih* mereka (Ibn Hajar, 1992).

Riwayat Ibn Majah daripada 'Abd al-Malik b. Muhammad


Asmaul Husna dalam riwayat Ibn Majah berjumlah 101 nama dengan dua nama berulang iaitu *al-Rahim* dan *al-Samad*. Hadith Abu Hurairah riwayat Ibn Majah berpunca daripada perawi 'Abd al-Malik b. Muhammad al-San'ani dari generasi tabi tabiin kecil. 'Abd al-Malik seorang perawi *layyin* menunjukkan riwayatnya sedikit dan tiada sokongan (Ibn Hajar, 2004). Riwayat Ibn Majah dikritik kerana perawi 'Abd al-Malik dan gurunya Zuhair. Zuhair b. Muhammad al-Tamimi (m.162H) seorang perawi *sadug* namun riwayat Zuhair yang diambil oleh penduduk Syam *munkar* manakala riwayatnya yang diambil oleh penduduk Basrah sahih (Ibn Hajar, 1984). Dalam sanad ini 'Abd al-Malik yang meriwayatkan daripada Zuhair dari penduduk Syam iaitu dari San'a', Damsyik. 'Abd al-Malik juga dikritik *layyin al-hadith* bermaksud riwayatnya yang ada sokongan sahaja diterima dan jika berseorangan ditolak.

Kajian menunjukkan riwayat 'Abd al-Malik berjumlah enam hadith dalam *al-Kutub al-Sittah*. Tiga hadithnya sahih kerana terdapat sokongan manakala tiga kekal *da'if* kerana tiada sokongan atau sanad yang menyokongnya juga lemah. Riwayat Asmaul Husna oleh Ibn Majah termasuk dalam kategori kekal *da'if* kerana lafaz yang ada sokongan ialah pada matan: "*Sesungguhnya bagi Allah itu 99 nama, seratus nama melainkan satu. Sesungguhnya Dia itu ganjil dan menyukai sesuatu yang ganjil. Sesiapa yang menghafalnya dia masuk ke dalam syurga.*" Manakala lafaz sambungan: "*Nama-nama itu ialah...*" tiada sanad lain yang menyokongnya (Wan Kamal Nadzif, 2017).

Riwayat al-Hakim daripada ‘Abd al-‘Aziz b. Husain

Asmaul Husna dalam riwayat al-Hakim berjumlah 94 nama sahaja dengan satu nama berulang iaitu *al-Majid*. Hadith Abu Hurairah riwayat al-Hakim berpunca daripada perawi ‘Abd al-‘Aziz b. Husain b. al-Tarjuman dari generasi tabi tabiin besar. ‘Abd al-‘Aziz b. Husain ialah seorang *da‘if al-hadith* seperti yang dinilai dalam kitab *al-Jarh wa al-Ta‘dil* (Ibn Abi Hatim, 1952). Riwayat al-Hakim dalam *al-Mustadrak* dikritik kerana perawi ‘Abd al-‘Aziz b. Husain kerana perawi ini *da‘if* seperti yang dinilai oleh Ibn Abi Hatim, Ibn ‘Adi, Abu al-Qasim al-Baghawi, al-Baihaqi, ‘Ali b. al-Madini dan Yahya b. Ma‘in (Al-Mizzi, 1994). Al-Bukhari mengkritiknya *laisa bi al-qawiy* manakalah al-Nasa‘i menilainya *matruk al-hadith*. Kata Ibn Hibban, dia meriwayatkan hadith palsu dengan menyandarkannya kepada perawi *thiqah* maka tidak harus berhujah dengannya (Ibn al-Jawzi, 1406H).

Kesimpulannya semua riwayat yang menghitung nama Asmaul Husna ialah *da‘if* kerana riwayatnya ganjil (*syadh*). Iaitu apabila dibandingkan dengan riwayat daripada perawi *thiqah* lain seperti dalam riwayat al-Tirmidhi yang sahih, riwayat al-Bukhari dan Muslim yang tidak menghitung nama-nama ini sebaliknya hanya menyebut bagi Allah SWT itu 99 nama. Riwayat yang menghitung nama Asmaul Husna tidak sunyi daripada kritikan seperti riwayat al-Tirmidhi kerana *‘illah tadlis*, riwayat Ibn Majah kerana perawi *layyin al-hadith* dan riwayat al-Hakim kerana perawi *da‘if al-hadith*. Ketiga-tiga riwayat ini bertentangan (*mukhalafah*) dengan riwayat perawi *thiqah* lain yang tidak menghitungnya. Riwayat yang tidak menghitung nama-nama ini terdapat dalam hadith Abu Hurairah, Salman al-Farisi, Ibn ‘Abbas, Ibn ‘Umar dan ‘Ali b. Abi Talib. Ringkasnya, terdapat tiga riwayat yang menghitung nama-nama Allah SWT iaitu al-Tirmidhi, Ibn Majah, al-Hakim dan ketiga-tiga riwayat ini terdapat percanggahan (*ikhtilaf syadid*), perselisihan, penambahan dan pengurangan (Ibn Hajar, 1992). Pohon sanad bagi hadith Asmaul Husna seperti rajah berikut (Al-Tirmidhi, t.th., Ibn Majah, t.th. & al-Hakim, 1990):



Rajah 1: Pohon Sanad Hadith Asmaul Husna

Penilaian Semula Oleh Ibn Hajar

Ibn Hajar al-‘Asqalani (m.852H) merupakan tokoh pertama yang mengkritik 27 nama yang masyhur dalam riwayat al-Tirmidhi (Ibn Hajar, 1989). Beliau menyimpulkan hitungan nama-nama ini ialah suatu

bentuk *mudraj* yang asalnya ijtihad daripada perawi namun diriwayatkan sebagai sebahagian daripada hadith. Ulama sejak zaman sebelum Ibn Hajar juga pernah berijtihad menghitung nama-nama ini seperti Sufyan b. ‘Uyainah, Ja‘far al-Sadiq, Abu Zaid al-Lughawi dan Muhammad b. Ibrahim al-Zahid (Ibn Hajar, 1992). Ibn Hazm berijtihad menghitung Asmaul Husna dalam *al-Muhalla* namun bilangan yang beliau kemukakan hanya 84 nama. Ibn ‘Arabi menghuraikan 84 nama ini dalam *al-Futuhat al-Makkiyyah*. Hasil perbandingan riwayat, 5 nama yang Ibn Hazm kemukakan tidak disebut dalam mana-mana hadith dan tidak dicadangkan oleh Ibn Hajar untuk dinilai semula. Nama-nama itu ialah *Allah*, *al-A‘azz*, *al-Dahr*, *al-Akbar* dan *Mihsan* (Ibn Hazm, 1352H).

Ibn Hazm dan Abu al-Hasan al-Asy‘ari berpandangan Asmaul Husna berjumlah 99 nama dan tidak boleh ditambah lebih daripada itu. Sebahagian besar ulama berpandangan nama-nama Allah SWT lebih banyak daripada itu seperti kata Ibn ‘Abbas, Fakhr al-Din al-Razi, al-Ghazali, al-Nawawi, Ibn Battal dan Ibn Kathir. Al-Bayhaqi dalam *al-Asma’ wa al-Sifat* menghitung 148 nama, al-Qurtubi menghitung hampir 200 nama dan Ibn al-‘Arabi menghitung 1,000 nama (Ahmad Mukhtar ‘Umar, 2000). Ibn Hajar dalam *Fath al-Bari* turut berijtihad menghitung 99 nama ini dengan menilai semula 27 nama yang terdapat dalam riwayat al-Tirmidhi. 27 nama tersebut ialah *al-Qābid*, *al-Bāsiṭ*, *al-Khāfid*, *al-Rāfi‘*, *al-Mu‘iz*, *al-Mudhil*, *al-‘Adl*, *al-Jalil*, *al-Bā‘ith*, *al-Muhsi*, *al-Mubdi‘*, *al-Mu‘id*, *al-Mumit*, *al-Wājid*, *al-Majid*, *al-Muqadim*, *al-Mu‘akhir*, *al-Wali*, *Dhu al-Jalal wa al-Ikram*, *al-Muqsit*, *al-Mughni*, *al-Māni‘*, *al-Dār*, *al-Nafi‘*, *al-Bāqi*, *al-Rasyid* dan *al-Sabur* (Ibn Hajar, 1992).

(1) Nama *al-Qābid* Kepada *al-Ilah*

Nama *al-Qābid* tiada dalam al-Quran sebaliknya bersumberkan hadith sahih ketika sebahagian Sahabat meminta Nabi SAW menetapkan harga barangan lalu baginda bersabda: “*Sesungguhnya Dialah al-Musa‘ir (yang menentukan naik turun harga), al-Qābid (yang menyempitkan) al-Bāsiṭ, al-Rāziq*” (Abu Dawud, t.th.). Digantikan dengan *al-Ilah* bersumberkan ayat: “*Dan Tuhan kamu semua (Ilahukum) ialah Tuhan yang satu*” (Al-Quran, 2:163). Nama ini terdapat dalam riwayat al-Hakim dan dicadangkan sebagai Asmaul Husna oleh Ibn Hazm serta Ibn Hajar. *Ilah* bermaksud Tuhan yang sebenar-benar disembah manakala *Rab* bermaksud Tuhan pencipta alam. Lebih daripada 50 ayat lafaz jalalah Allah digandingkan dengan maksud ibadat dalam al-Quran.

(2) Nama *al-Bāsiṭ* Kepada *al-Qāhir*

Nama *al-Bāsiṭ* bersumberkan hadith sahih: “*Sesungguhnya Allah Dialah al-Musa‘ir, al-Qābid, al-Bāsiṭ, al-Rāziq. Dan sungguh aku berharap untuk bertemu Allah dalam keadaan tiada seorang pun datang menuntut padaku akibat kezaliman pada darah dan harta*” (Abu Dawud, t.th.). Digantikan dengan *al-Qāhir* yang bersumberkan ayat: “*Dan Dialah yang berkuasa (al-Qāhir) atas hamba-hambanya*” (Al-Quran, 6:18). *Al-Qahir* diulang 2 kali dalam al-Quran (Assayyid, 2014). Ia terdapat dalam riwayat Ibn Majah dan dicadangkan sebagai Asmaul Husna oleh Ibn Hazm serta Ibn Hajar.

(3) Nama *al-Khāfid* Kepada *al-Musta‘an*

Nama *al-Khāfid* tiada dalam al-Quran sebaliknya bersumberkan hadith sahih: “*Sesungguhnya Allah tidak tidur dan tidak selayaknya untuk Dia tidur. Dia mengangkat timbangan dan menurunkannya (yakhfiduhu)*” (Muslim, 2003). Ia bukan dalam bentuk kata nama tapi terhasil daripada pecahan kata kerja (*al-isytiqaq*). Digantikan dengan *al-Musta‘an* bersumberkan ayat: “*Dan Allah jualah yang dipohon pertolonganNya (al-Musta‘an), atas apa yang kamu sifatkan itu*” (Al-Quran, 12:18). Nama ini diulang 2 kali dalam al-Quran dan dicadangkan sebagai Asmaul Husna oleh Ibn Hajar.

(4) Nama *al-Rāfi‘* Kepada *al-Syākir*

Nama *al-Rāfi‘* bersumberkan ayat: “*Ketika Allah berfirman, wahai ‘Isa sesungguhnya Aku mewafatkanmu dan mengangkatmu (rāfi‘uka) kepadaKu*” (Al-Quran, 3:55). Ia bukan dalam bentuk kata nama tapi terhasil daripada pecahan kata kerja. Digantikan dengan *al-Syākir* yang bersumberkan ayat: “*Dan Allah itu Maha Menghargai (Syākir) dan Maha Mengetahui*” (Al-Quran, 4:147). *Al-Syākir* diulang 2 kali dalam al-Quran (Assayyid, 2014). Ia terdapat dalam riwayat al-Hakim dan dicadangkan sebagai Asmaul Husna oleh Ibn Hazm serta Ibn Hajar.

(5) Nama *al-Mu'iz* Kepada *al-Khallāq*

Nama *al-Mu'iz* bersumberkan ayat: “*Engkau juga yang memuliakan (tu'izzu) sesiapa yang Engkau kehendaki*” (Al-Quran, 3:26). Nama *al-Mu'iz* terpecah daripada sifat kata kerja (*al-isytiqaq min sifat al-af'al*). Digantikan dengan *al-Khallāq* bersumberkan ayat: “*Sesungguhnya Tuhanmu, Dialah yang menciptakan (al-Khallāq) sekalian makhluk, lagi Maha Mengetahui*” (Al-Quran, 15:86). *Al-Khallāq* diulang 2 kali dalam al-Quran (Assayyid, 2014). Ia terdapat dalam riwayat al-Hakim dan dicadangkan sebagai Asmaul Husna oleh Ibn Hazm serta Ibn Hajar.

(6) Nama *al-Mudhil* Kepada *al-Muḥit*

Nama *al-Mudhil* bersumberkan ayat: “*Dan Engkaulah yang menghina (tudhillu) sesiapa yang Engkau kehendaki*” (Al-Quran, 3:26). Nama *al-Mudhil* terpecah daripada sifat kata kerja. Digantikan dengan *al-Muḥit* bersumberkan ayat: “*Ingatlah! Sesungguhnya Dia Maha Meliputi (Muḥit) segala sesuatu*” (Al-Quran, 41:54). Nama ini diulang 8 kali dalam al-Quran (Assayyid, 2014). Ia dicadangkan sebagai Asmaul Husna oleh Ibn Hajar.

(7) Nama *al-'Adl* Kepada *al-Rab*

Nama *al-'Adl* terdapat dalam al-Quran ketika Allah SWT memerintahkan untuk berlaku adil iaitu pada ayat: “*Sesungguhnya Allah menyuruh berlaku adil (al-'adl) dan berbuat baik*” (Al-Quran, 16:90). Digantikan dengan *al-Rab* yang bersumberkan ayat: “*Mereka juga beroleh ucapan salam sejahtera dari Tuhan (Rab) Yang Maha Mengasihani*” (Al-Quran, 36:58). *Al-Rab* diulang sebanyak 900 kali dalam al-Quran (Assayyid, 2014). Ia terdapat dalam riwayat Ibn Majah dan al-Hakim serta dicadangkan sebagai Asmaul Husna oleh Ibn Hazm juga Ibn Hajar.

(8) Nama *al-Jalil* Kepada *al-Ghālib*

Nama *al-Jalil* tidak terdapat dalam al-Quran dengan bentuk kata nama sebaliknya kata sifat pada ayat yang mensifatkan zat Tuhan: “*Dan akan kekallah zat Tuhanmu yang mempunyai Kebesaran (Dhu al-Jalāl) dan Kemuliaan*” (Al-Quran, 55:27). Nama *al-Jalil* ialah kata yang terpecah daripada sifat (*al-isytiqaq min al-wasf*). Dari sudut bahasa, *Dhu* ialah *al-Asma' al-Khamsah* dan Allah SWT menamakanNya yang empunya kebesaran *al-Jalāl* bukannya *al-Jalil*. Ini berbeza dengan *Dhu al-Quwwah* dan *Dhu al-Rahmah* kerana Tuhan turut menamakanNya *al-Qawiy* dan *al-Rahmān*. Digantikan dengan *al-Ghālib* yang juga bukan kata nama dalam bentuk mutlak kerana memerlukan kata tambahan (*iḍāfah*) bersumberkan ayat: “*Dan Allah Maha Kuasa (Ghālibun) melakukan segala perkara yang telah ditetapkanNya*” (Al-Quran, 12:21). Ia dicadangkan sebagai Asmaul Husna oleh Ibn Hajar.

(9) Nama *al-Bā'ith* Kepada *al-Kafil*

Nama *al-Bā'ith* berasal daripada kata kerja bersumberkan ayat: “*Hari yang ketika Allah membangkitkan (yab'athuhum) mereka semua*” (Al-Quran, 58:6). Ia disebut dalam bentuk kata nama pada hadith qudsi: “*Wahai 'Isa, Aku bangkitkan (bā'ith) selepas kamu satu umat...*” namun hadith ini sanadnya *ḍa'if* disebabkan terdapat perawi *majhul al-ḥal* (Ahmad, 1999). Digantikan dengan *al-Kafil* bersumberkan ayat: “*Sedang kamu telah menjadikan Allah sebagai Penjamin (Kafilan) sumpahmu*” (Al-Quran, 16:91). Nama ini diulang sekali dalam al-Quran (Assayyid, 2014). Ia terdapat dalam riwayat al-Hakim dan dicadangkan sebagai Asmaul Husna oleh Ibn Hajar.

(10) Nama *al-Muḥsi* Kepada *al-Ḥāfīz*

Nama *al-Muḥsi* berasal daripada kata kerja bersumberkan ayat: “*Dan ingatlah tiap-tiap sesuatu Kami hitungnya (aḥṣaināhu) di dalam Kitab Lauh Mahfuz yang jelas nyata*” (Al-Quran, 36:12). Digantikan dengan *al-Ḥāfīz* bersumberkan ayat: “*Oleh itu Allah jualah Penjaga (Ḥāfīzan) yang sebaik-baiknya*” (Al-Quran, 12:64). Nama ini diulang 3 kali dalam al-Quran (Assayyid, 2014). Ia terdapat dalam riwayat Ibn Majah dan dicadangkan sebagai Asmaul Husna oleh Ibn Hajar.

(11) Nama *al-Mubdi'* Kepada *al-Rafī'*

Nama *al-Mubdi'* berasal daripada kata kerja bersumberkan ayat: “*Sesungguhnya Dialah yang menciptakan pada mulanya (yubdi'u), dan yang mengembalikannya*” (Al-Quran, 85:13). Digantikan dengan *al-Rafī'* yang juga bukan kata nama mutlak sebaliknya *muqayyad* kerana memerlukan kata

tambahan selepasnya bersumberkan ayat: “*Dialah Yang Maha Tinggi (Rafi‘) darjat kebesarannya*” (Al-Quran, 40:15). Nama ini terdapat dalam riwayat al-Hakim dan dicadangkan sebagai Asmaul Husna oleh Ibn Hajar.

(12) Nama *al-Mu‘id* Kepada *al-Mubin*

Nama *al-Mu‘id* berasal daripada kata kerja bersumberkan ayat: “*Sesungguhnya Dialah yang menciptakan pada mulanya, dan yang mengembalikannya (yu‘idu)*” (Al-Quran, 85:13). Digantikan dengan *al-Mubin* bersumberkan ayat: “*Sesungguhnya Allah itu Dia yang Maha Benar lagi Maha Menjelaskan (kewujudan dan keesaannya dengan dalil) (al-Mubin)*” (Al-Quran, 24:25). Nama ini diulang sekali dalam al-Quran (Assayyid, 2014). Ia terdapat dalam riwayat Ibn Majah dan al-Hakim serta dicadangkan sebagai Asmaul Husna oleh Ibn Hazm juga Ibn Hajar.

(13) Nama *al-Mumit* Kepada *al-Mawlā*

Nama *al-Mumit* diambil daripada kata kerja pada ayat: “*Sesudah itu Dia mematikan kamu (yumitukum) kemudian Dia menghidupkan kamu semula*” (Al-Quran, 30:40). Digantikan dengan *al-Mawlā* bersumberkan ayat: “*Dialah Pelindung kamu. Maka Dialah sahaja sebaik-baik Pelindung (al-Mawlā) dan sebaik-baik Penolong*” (Al-Quran, 22:78). *Al-Mawlā* diulang 12 kali dalam al-Quran (Assayyid, 2014). Ia terdapat dalam riwayat al-Hakim dan dicadangkan sebagai Asmaul Husna oleh Ibn Hajar.

(14) Nama *al-Wajid* Kepada *al-Nasir*

Nama *al-Wājid* tiada dalam al-Quran sebaliknya bersumberkan hadith qudsi: “*... Ini kerana Aku adalah Jawad, Majid, Wajid. Aku lakukan apa Aku kehendaki...*” (Ahmad, 1999). Namun sanad ini *ḍa‘if* kerana perawi Syahr b. Hawsyab, seorang yang *saduq kathir al-irsal wa al-awham* (Ibn Hajar, 2004). Digantikan dengan *al-Nasir* bersumberkan ayat: “*Dialah Pelindung kamu. Maka Dialah sahaja sebaik-baik Pelindung dan sebaik-baik Penolong (al-Nasir)*” (Al-Quran, 22:78). *Al-Nasir* diulang 4 kali dalam al-Quran (Assayyid, 2014). Ia terdapat dalam riwayat al-Hakim dan dicadangkan sebagai Asmaul Husna oleh Ibn Hajar.

(15) Nama *al-Majid* Kepada *al-Aḥad*

Nama *al-Qā‘im* tiada dalam al-Quran sebaliknya bersumberkan hadith qudsi: “*... Ini kerana Aku adalah Jawad, Majid, Wajid. Aku lakukan apa Aku kehendaki...*” (Ahmad, 1999). Sanad ini *ḍa‘if* kerana perawi Syahr b. Hawsyab seorang yang benar namun dari sudut periwayatan kerap melakukan *irsal* dan banyak keliru (Ibn Hajar, 2004). Digantikan dengan *al-Aḥad* bersumberkan ayat: “*Katakanlah (TuhanKu) ialah Allah yang Maha Esa (Aḥad)*” (Al-Quran, 112:1). Nama ini terdapat dalam riwayat Ibn Majah dan al-Hakim dan diulang sebanyak sekali dalam al-Quran (Assayyid, 2014). Ia dicadangkan sebagai Asmaul Husna oleh Ibn Hazm dan Ibn Hajar.

(16) Nama *al-Muqadim* Kepada *al-Qā‘im*

Nama *al-Muqadim* tiada dalam al-Quran sebaliknya bersumberkan doa tahajud daripada Nabi SAW: “*...Engkaulah yang mendahulukan (al-Muqadim), dan Engkaulah yang mengakhirkan...*” (Al-Bukhari, 2004). Digantikan dengan *al-Qā‘im* yang juga bukan kata nama dalam bentuk mutlak kerana memerlukan kata tambahan bersumberkan ayat: “*Apakah patut disamakan Allah Tuhan yang mengawasi (Qā‘im) tiap-tiap diri dengan yang tidak bersifat demikian*” (Al-Quran, 13:33). Nama ini terdapat dalam riwayat Ibn Majah dan dicadangkan sebagai Asmaul Husna oleh Ibn Hajar.

(17) Nama *al-Mu‘akhir* Kepada *al-Fāṭir*

Nama *al-Mu‘akhir* tiada dalam al-Quran sebaliknya bersumberkan hadith sahih daripada Nabi SAW: “*...Engkaulah yang mendahulukan dan Engkaulah yang mengakhirkan (al-Mu‘akhir)...*” (Al-Bukhari, 2004). Digantikan dengan *al-Fāṭir* yang juga bukan kata nama mutlak kerana memerlukan kata tambahan bersumberkan ayat: “*Ucapkanlah, wahai Tuhan yang menciptakan (Fāṭir) langit-langit dan bumi*” (Al-Quran, 39:46). Nama ini terdapat dalam riwayat Ibn Majah dan al-Hakim serta dicadangkan sebagai Asmaul Husna oleh Ibn Hajar.

(18) Nama *al-Wali* Kepada *al-Kāfi*

Nama *al-Wali* (dengan *alif*) tiada dalam al-Quran sebaliknya yang ada ialah *al-Wali* (tanpa *alif*) dan *al-Mawla*. Ia diambil secara isyarat daripada ayat: “*Dan tiada bagi mereka selainNya sebagai penjaga (Wal)*” (Al-Quran, 13:11). Digantikan dengan *al-Kāfi* bersumberkan ayat: “*Bukankah Allah cukup (Kāfin) untuk (mengawal dan melindungi) hambaNya*” (Al-Quran, 39:36). Nama ini diulang sekali dalam al-Quran (Assayyid, 2014). Ia terdapat dalam riwayat Ibn Majah dan al-Hakim serta dicadangkan sebagai Asmaul Husna oleh Ibn Hajar.

(19) Nama *Dhu al-Jalal wa al-Ikram* Kepada *al-Mālik*

Nama *Dhu al-Jalāl wa al-ikrām* disebut dalam al-Quran secara terikat (*muqayyad*) dalam bentuk sifat seperti pada ayat: “*Dan akan kekallah zat Tuhanmu yang mempunyai Kebesaran dan Kemuliaan (Dhu al-Jalal wa al-Ikram)*” (Al-Quran, 55:27). Digantikan dengan *al-Mālik* bersumberkan ayat: “*...Di sisi Tuhan yang menguasai (Malik) segala-galanya, lagi yang berkuasa melakukan sekehendakNya*” (Al-Quran, 54:55). Nama ini terdapat dalam riwayat al-Hakim dan diulang sekali dalam al-Quran (Assayyid, 2014). Ia dicadangkan sebagai Asmaul Husna oleh Ibn Hazm dan Ibn Hajar.

(20) Nama *al-Muqsit* Kepada *al-Ghāfir*

Nama *al-Muqsit* tidak disebut dalam al-Quran dan hadith secara jelas sama ada dalam bentuk kata nama, sifat atau perbuatan. Sebaliknya Tuhan memerintahkan untuk berlaku adil dan Dia menyukai mereka yang menegakkan keadilan. Firman Allah SWT: “*Katakanlah: Tuhanku menyuruh berlaku adil (al-qist)*” (Al-Quran, 7:29) dan pada ayat: “*Kerana sesungguhnya Allah mengasihi orang yang berlaku adil (al-muqsitin)*” (Al-Quran, 5:42). Digantikan dengan *al-Ghāfir* yang bukanlah kata nama mutlak kerana memerlukan kata sambungan selepasnya iaitu ayat: “*Yang mengampunkan (Ghāfir) dosa dan yang menerima taubat*” (Al-Quran, 40:3). Nama ini diulang sekali dalam al-Quran (Assayyid, 2014). Ia dicadangkan sebagai Asmaul Husna oleh Ibn Hajar.

(21) Nama *al-Mughni* Kepada *al-Syadid*

Nama *al-Mughni* tidak disebut dalam al-Quran secara mutlak sebaliknya pecahan daripada perbuatan pada ayat: “*...sehingga Allah memberi kekayaan (yughniya) kepada mereka dari limpah kurniaNya*” (Al-Quran, 24:33). Digantikan dengan *al-Syadid* yang juga bukan kata nama mutlak kerana memerlukan kata tambahan yang diambil daripada ayat: “*Yang berat (Syadid) azabNya, yang melimpah kurnia*” (Al-Quran, 40:3). Nama ini terdapat dalam riwayat Ibn Majah dan dicadangkan sebagai Asmaul Husna oleh Ibn Hajar.

(22) Nama *al-Māni‘* Kepada *al-Qadir*

Nama *al-Māni‘* tidak disebut dalam al-Quran secara jelas sebaliknya pecahan daripada kata kerja seperti pada ayat: “*Dan tiada yang menghalang Kami (mana’anā) dari menghantar turun mukjizat yang mereka minta itu melainkan kerana jenis mukjizat itu telah didustakan oleh kaum-kaum yang telah lalu*” (Al-Quran, 17:59). Digantikan dengan *al-Qadir* bersumberkan ayat: “*Dan Dia Maha Kuasa (Qadir) atas tiap-tiap sesuatu*” (Al-Quran, 30:50). Nama *al-Qadir* diulang sebanyak 45 kali dalam al-Quran (Assayyid, 2014). Ia terdapat dalam riwayat al-Hakim dan dicadangkan sebagai Asmaul Husna oleh Ibn Hazm serta Ibn Hajar.

(23) Nama *al-Dār* Kepada *al-A‘lā*

Nama *al-Dār* tidak disebut dalam al-Quran dalam bentuk kata nama, sifat mahupun perbuatan melainkan secara mafhum daripada pecahan makna (*al-isytiqaq min al-ma‘na*) pada ayat: “*Katakanlah, aku tidak berkuasa mendatangkan manfaat bagi diriku dan tidak dapat menolak mudarat (ḍarran) kecuali apa yang dikehendaki Allah*” (Al-Quran, 7:188). Digantikan dengan *al-A‘lā* bersumberkan ayat: “*Bertasbihlah mensucikan nama Tuhanmu yang Maha Tinggi (al-A‘lā)*” (Al-Quran, 87:1). Nama ini diulang sebanyak 2 kali dalam al-Quran (Assayyid, 2014). Ia dicadangkan sebagai Asmaul Husna oleh Ibn Hazm dan Ibn Hajar.

(24) Nama *al-Nāfi‘* Kepada *al-Akram*

Nama *al-Nāfi‘* diambil secara makna pada ayat: “*Katakanlah, aku tidak berkuasa mendatangkan manfaat (naf‘an) bagi diriku dan tidak dapat menolak mudarat kecuali apa yang dikehendaki Allah*”

(Al-Quran, 7:188). Digantikan dengan *al-Akram* bersumberkan ayat: “*Bacalah, dan Tuhanmu yang Maha Pemurah (al-Akram)*” (Al-Quran, 96:3). Nama ini terdapat dalam riwayat al-Hakim dan diulang sekali dalam al-Quran (Assayyid, 2014). Ia dicadangkan sebagai Asmaul Husna oleh Ibn Hazm dan Ibn Hajar.

(25) Nama *al-Bāqi* Kepada *al-Hafī*

Nama *al-Bāqi* disebut dalam al-Quran secara terikat yang berasal daripada kata kerja pada ayat: “*Dan akan kekallah (yabqā) zat Tuhanmu yang mempunyai Kebesaran dan Kemuliaan*” (Al-Quran, 55:27). Digantikan dengan *al-Hafī* yang diambil daripada doa Nabi Ibrahim kepada ayahnya pada ayat: “*Aku akan memohon kepada Tuhanku mengampuni dosamu, sesungguhnya Dia amat melimpah ihsanNya (Hafiyyan) kepadaku*” (Al-Quran, 19:47). Nama ini dicadangkan sebagai Asmaul Husna oleh Ibn Hajar.

(26) Nama *al-Rasyid* Kepada *al-‘Alim*

Nama *al-Rasyid* diambil daripada al-Quran secara mafhum pada ayat: “*Dan demi sesungguhnya, Kami telah memberi kepada Ibrahim jalan yang benar (rusyduhu)*” (Al-Quran, 21:51). Digantikan dengan *al-‘Alim* yang juga bukan kata nama mutlak kerana memerlukan kata sambungan selepasnya seperti pada ayat: “*Allah yang mengetahui (‘Alim) segala yang tersembunyi dan yang nyata*” (Al-Quran, 23:92). Nama ini diulang sebanyak 13 kali dalam al-Quran (Assayyid, 2014). Ia dicadangkan sebagai Asmaul Husna oleh Ibn Hajar.

(27) Nama *al-Sabur* Kepada *al-Qarib*

Nama *al-Ṣabur* tiada dalam al-Quran sebaliknya diambil daripada hadith sahih secara mafhum: “*Tiada seorang pun yang lebih sabar (aṣbaru) terhadap yang menyakitinya selain Allah, manusia mendakwa bagiNya anak kemudian Dia maafkan dan memberi mereka rezeki*” (Al-Bukhari, 2004). Digantikan nama ini dengan *al-Qarib* bersumberkan ayat: “*Sesungguhnya Tuhanku sentiasa dekat (Qarib) lagi sentiasa memperkenankan (permohonan hambaNya)*” (Al-Quran 11:61). Nama ini diulang sebanyak 3 kali dalam al-Quran (Assayyid, 2014). Ia terdapat dalam riwayat Ibn Majah dan al-Hakim serta dicadangkan sebagai Asmaul Husna oleh Ibn Hazm juga Ibn Hajar.

Jadual 2: Perbandingan Riwayat Mengenai Nama Asmaul Husna

Bil.	Riwayat Tirmidhi	al- Riwayat Majah	Ibn Riwayat Hakim	al- Penilaian Ibn Hajar
1.	الرَّحْمَنُ	الرَّحْمَنُ	الرَّحْمَنُ	الرَّحْمَنُ
2.	الرَّحِيمُ	الرَّحِيمُ	الرَّحِيمُ	الرَّحِيمُ
3.	الْمَلِكُ	الْمَلِكُ	الْمَلِكُ	الْمَلِكُ
4.	الْقُدُّوسُ	الرَّائِدُ	الْقُدُّوسُ	الْقُدُّوسُ
5.	السَّلَامُ	السَّلَامُ	السَّلَامُ	السَّلَامُ
6.	الْمُؤْمِنُ	الْمُؤْمِنُ	الْمُؤْمِنُ	الْمُؤْمِنُ
7.	الْمُهَيِّمُ	الْمُهَيِّمُ	الْمُهَيِّمُ	الْمُهَيِّمُ
8.	الْعَزِيزُ	الْعَزِيزُ	الْعَزِيزُ	الْعَزِيزُ
9.	الْجَبَّارُ	الْجَبَّارُ	الْجَبَّارُ	الْجَبَّارُ
10.	الْمُتَكَبِّرُ	الْمُتَكَبِّرُ	الْمُتَكَبِّرُ	الْمُتَكَبِّرُ
11.	الْحَالِقُ	الْحَالِقُ	الْحَالِقُ	الْحَالِقُ
12.	الْبَارِئُ	الْبَارِئُ	الْبَارِئُ	الْبَارِئُ
13.	الْمُصَوِّرُ	الْمُصَوِّرُ	الْمُصَوِّرُ	الْمُصَوِّرُ
14.	الْغَفَّارُ	الْبَرَّهَانُ	الْغَفَّارُ	الْغَفَّارُ
15.	الْقَهَّارُ	الْعَالِمُ	الْبِعْثُ	الْقَهَّارُ
16.	الْوَهَّابُ	الْوَهَّابُ	الْوَهَّابُ	الْوَهَّابُ

17.	الرَّزَّاقُ	الرَّزَّاقُ	الرَّزَّاقُ	الرَّزَّاقُ
18.	الْفَتْاحُ	الْقَاهِرُ	الْفَتْاحُ	الْفَتْاحُ
19.	الْعَلِيمُ	الْعَلِيمُ	الْعَلِيمُ	الْعَلِيمُ
20.	الْقَابِضُ	الْقَابِضُ	ذُو الْفَضْلِ	الْإِلَهِ
21.	الْبَاسِطُ	الْبَاسِطُ	ذُو الْمَعَارِجِ	الْقَاهِرُ
22.	الْحَافِضُ	الْحَافِضُ	ذُو الطُّوْلِ	المُسْتَعَانَ
23.	الرَّافِعُ	الرَّافِعُ	الشَّاكِرُ	الشَّاكِرُ
24.	المُعِزُّ	المُعِزُّ	الْحَلَّاقُ	الْحَلَّاقُ
25.	المُنِذِلُ	الجَمِيلُ	الجَمِيلُ	المُحِيطُ
26.	السَّمِيعُ	السَّمِيعُ	السَّمِيعُ	السَّمِيعُ
27.	البَصِيرُ	البَصِيرُ	البَصِيرُ	البَصِيرُ
28.	الْحَكَمُ	الْهَادِي	الْهَادِي	الْحَكَمُ
29.	العَدْلُ	الرَّبُّ	الرَّبُّ	الرَّبُّ
30.	اللَّطِيفُ	اللَّطِيفُ	اللَّطِيفُ	اللَّطِيفُ
31.	الْخَبِيرُ	الْخَبِيرُ	الْخَبِيرُ	الْخَبِيرُ
32.	الْحَلِيمُ	الْحَلِيمُ	الْحَلِيمُ	الْحَلِيمُ
33.	العَظِيمُ	العَظِيمُ	العَظِيمُ	العَظِيمُ
34.	العَفْوَرُ	العَفْوَرُ	العَفْوَرُ	العَفْوَرُ
35.	الشُّكُورُ	الشُّكُورُ	الشُّكُورُ	الشُّكُورُ
36.	العَلِيُّ	العَلِيُّ	العَلِيُّ	العَلِيُّ
37.	الكَبِيرُ	المُنِيرُ	الكَبِيرُ	الكَبِيرُ
38.	الْحَقِيقُ	الْحَافِظُ	الْحَقِيقُ	الْحَقِيقُ
39.	المَقِيبُ	القَائِمُ	الْحَنَّانُ	المَقِيبُ
40.	الحَسِيبُ	الْوَاقِي	المُغِيثُ	الحَسِيبُ
41.	الجَلِيلُ	الجَلِيلُ	الجَلِيلُ	العَالِبُ
42.	الْكَرِيمُ	الْكَرِيمُ	الْكَرِيمُ	الْكَرِيمُ
43.	الرَّقِيبُ	المُبْدِي	الرَّقِيبُ	الرَّقِيبُ
44.	المُجِيبُ	المُجِيبُ	المُجِيبُ	المُجِيبُ
45.	الْوَاسِعُ	المَاجِدُ	الْوَاسِعُ	الْوَاسِعُ
46.	الْحَكِيمُ	الْحَكِيمُ	الْكَفِيلُ	الْحَكِيمُ
47.	الْوُدُودُ	الْوُدُودُ	الْوُدُودُ	الْوُدُودُ
48.	المَجِيدُ	المَجِيدُ	المَجِيدُ	المَجِيدُ
49.	الْبَاعِثُ	الْبَاعِثُ	العَلَامُ	الْكَفِيلُ
50.	الشَّهِيدُ	الشَّهِيدُ	الشَّهِيدُ	الشَّهِيدُ
51.	الْحَقُّ	الْحَقُّ	الْحَقُّ	الْحَقُّ
52.	الْوَكِيلُ	الْوَكِيلُ	الْوَكِيلُ	الْوَكِيلُ
53.	القَوِيُّ	القَوِيُّ	المَدْبِرُ	القَوِيُّ
54.	الْمَتِينُ	الْمَتِينُ	الرَّفِيعُ	الْمَتِينُ
55.	الْوَيُّْ	الْوَيُّْ	المُعِيدُ	الْوَيُّْ
56.	الْحَمِيدُ	الصَّادِقُ	الصَّادِقُ	الْحَمِيدُ
57.	المُحْصِي	المُمِيتُ	المُمِيتُ	الْحَافِظُ

58.	الرَّفِيعُ	الرَّفِيعُ	الرَّفِيعُ	الرَّفِيعُ
59.	المُبِينُ	المُبِينُ	المُبِينُ	المُبِينُ
60.	المُوْتَى	المُوْتَى	المُوْتَى	المُوْتَى
61.	التَّصْبِيرُ	التَّصْبِيرُ	التَّصْبِيرُ	التَّصْبِيرُ
62.	الحَيُّ	الحَيُّ	الحَيُّ	الحَيُّ
63.	الْقَيُّومُ	الْقَيُّومُ	الْقَيُّومُ	الْقَيُّومُ
64.	المُحْيِي	المُحْيِي	المُحْيِي	المُحْيِي
65.	الأَحَدُ	الأَحَدُ	الأَحَدُ	الأَحَدُ
66.	الْوَاحِدُ	الْوَاحِدُ	الْوَاحِدُ	الْوَاحِدُ
67.	الصَّمَدُ	الصَّمَدُ	الصَّمَدُ	الصَّمَدُ
68.	القَادِرُ	القَادِرُ	القَادِرُ	القَادِرُ
69.	المُقْتَدِرُ	المُقْتَدِرُ	المُقْتَدِرُ	المُقْتَدِرُ
70.	القَائِمُ	القَائِمُ	القَائِمُ	القَائِمُ
71.	الفَاطِرُ	الفَاطِرُ	الفَاطِرُ	الفَاطِرُ
72.	الأَوَّلُ	الأَوَّلُ	الأَوَّلُ	الأَوَّلُ
73.	الآخِرُ	الآخِرُ	الآخِرُ	الآخِرُ
74.	الظَّاهِرُ	الظَّاهِرُ	الظَّاهِرُ	الظَّاهِرُ
75.	البَّاطِنُ	البَّاطِنُ	البَّاطِنُ	البَّاطِنُ
76.	الكَافِي	الكَافِي	الكَافِي	الكَافِي
77.	المُتَعَالِي	المُتَعَالِي	المُتَعَالِي	المُتَعَالِي
78.	الْبِرُّ	الْبِرُّ	الْبِدِيعُ	الْبِرُّ
79.	التَّوَابُ	التَّوَابُ	التَّوَابُ	التَّوَابُ
80.	المُنْتَقِمُ	الصَّارُ	الإِلَهُ	المُنْتَقِمُ
81.	العَفْوُ	العَفْوُ	القَدِيمُ	العَفْوُ
82.	الرَّءُوفُ	الرَّءُوفُ	الرَّءُوفُ	الرَّءُوفُ
83.	مَالِكِ الْمَلِكِ	القَدِيمُ	المَالِكُ	المَالِكُ
84.	ذُو الْجَلَالِ وَالْإِكْرَامِ	ذُو الْقُوَّةِ	الأَحْرَمُ	العَافِرُ
85.	المُنْقَسِطُ	المُنْقَسِطُ	المَلِيكُ	المَلِيكُ
86.	الْجَامِعُ	الْجَامِعُ	ذُو الْجَلَالِ وَالْإِكْرَامِ	الْجَامِعُ
87.	الْعَيْيُ	الكَافِي	النُّورُ	الْعَيْيُ
88.	المُعْنِي	الشَّدِيدُ	البَّاقِي	الشَّدِيدُ
89.	الْمَانِعُ	الْعَيْيُ	الْعَيْيُ	القَدِيرُ
90.	الصَّارُ	الْوَثْرُ	الْوَثْرُ	الأَعْلَى
91.	النَّافِعُ	النَّافِعُ	الْمَنَّانُ	الأَحْرَمُ
92.	النُّورُ	النُّورُ	القَدِيرُ	النُّورُ
93.	الْهَادِي	الْمُدْلُ	القَرِيبُ	الْهَادِي
94.	الْبِدِيعُ	السَّمَاعُ	(الْمَجِيدُ)	الْبِدِيعُ
95.	البَّاقِي	البَّاقِي		الْحَيُّ
96.	الْوَارِثُ	التَّامُّ		الْوَارِثُ
97.	الرَّشِيدُ	الْوَارِثُ		العَالِمُ
98.	الصَّبُورُ	الْمَانِعُ		القَرِيبُ

99.	القَرِيبُ	اللهُ
100.	(الرَّحِيمُ)	(الخالِقُ)
101.	(الصَّمَدُ)	(الحَاكِمُ)

Daripada 27 nama gantian yang Ibn Hajar kemukakan, satu nama secara berulang kerana ia sememangnya terdapat dalam riwayat al-Tirmidhi iaitu *al-Khāliq*. Satu nama gantian iaitu *al-Hakim* yang dikemukakan pada awalnya, tidak beliau senaraikan selepas itu sebagai 99 nama Asmaul Husna menurut ijtihadnya. Dua nama iaitu *al-‘Alim* dan *al-Musta‘an* tidak beliau kemukakan pada awalnya sebagai nama gantian, namun disenaraikan selepas itu sebagai sebahagian 99 nama Asmaul Husna (Ibn Hajar, 1992). Ibn Hajar turut menjadikan nama *Allah* itu sendiri sebagai salah satu nama Asmaul Husna. Ini disebabkan Allah merupakan nama agung (*ism al-Jalalah*) dan nama besar (*ism al-A‘zam*) yang merujuk kepada zat yang dinamakan iaitu Allah. Menurut Ibn Qayyim, semua nama Asmaul Husna menunjukkan kepada nama agung ini. Nama *al-Rahmān*, *al-Qudus* sebahagian daripada nama Allah tetapi *Allah* bukan sebahagian daripada nama *al-Rahmān* atau *al-Qudus* (Mahmud ‘Abd al-Raziq, 2012). Ibn Hazm turut menyenaraikan *Allah* sebagai sebahagian daripada Asmaul Husna. Nama Allah diulang sebanyak 2,724 kali dalam al-Quran (Assayyid, 2014).

Hasil kajian menunjukkan Ibn Hajar sebenarnya menggugurkan 26 nama yang terdapat dalam riwayat al-Tirmidhi dan beliau menambah 27 nama baharu yang tidak terdapat dalam riwayat al-Tirmidhi. Daripada 27 nama dalam riwayat al-Tirmidhi yang Ibn Hajar kritik, empat nama sebenarnya sahih kerana terdapat dalam hadith Nabi SAW iaitu *al-Qābid*, *al-Bāsit*, *al-Muqadīm* dan *al-Mu‘akhir*. Ibn Hazm turut memasukkan keempat-empat nama ini sebagai Asmaul Husna (Ibn Hazm, 1352H).

KESIMPULAN

Nama Asmaul Husna yang masyhur didendangkan sebagai nasyid di negara kita sebenarnya bersumberkan riwayat al-Tirmidhi. Terdapat dua lagi riwayat yang menghitung nama-nama ini iaitu riwayat Ibn Majah dan al-Hakim. Hitungan nama-nama ini bukanlah suatu kata putus yang sabit daripada Nabi SAW sebaliknya merupakan ijtihad daripada perawi-perawi hadith. Para ulama sejak zaman dahulu hingga kini masih berusaha mencari dan menghitung nama-nama ini antaranya Ibn Hajar. Kajian perlu terus dilaksanakan bagi mencari 99 nama yang memenuhi kriteria Asmaul Husna.

RUJUKAN

Abu Dawud, Sulaymān b. al-Asy'ath al-Sajistāni (t.th.), *Sunan Abi Dawud, tahqiq*: Muhammad Nāṣir al-Din al-Albāni, Riyad: Maktabaṭ al-Ma'ārif.

Ahmad Mukhtar 'Umar (2000), *Asma>'ulla>h al-H}usna: Dira>sah fi al-Binyah wa al-Dala>lah*, t.t.p: Maktabaṭ al-Ussrah.

Al-Albāni, Muhammad Nāṣir al-Din (1411H/1991), *Ḍa'if Sunan al-Tirmidhi*, Beirut: Al-Maktab al-Islami.

Al-Albāni, Muhammad Nāṣir al-Din (t.th.), *Sahih wa Da'if al-Jami' al-Saghir wa Ziyadatuh*, t.t.p: Al-Maktab al-Islami.

Al-Albāni, Muhammad Nāṣir al-Din (t.th.), *Al-Silsilaṭ al-Ṣahihah*, Riyad: Maktabaṭ al-Ma'ārif.

Al-Ami'r al-S}an'a>ni, Muḥammad b. Isma'i'l (1960/1379H), *Subul al-Salam*, Syria: Maktabah Mustafa al-Babi al-Halabi.

Assayyid, Muhammad Mustafa Bakri (2014), *The Beautiful Names of Allah Exhibition*, Riyadh: King Fahd National Library.

Al-Bukhāri, Muhammad b. Isma'il b. Ibrahim (1424H/2004), *Ṣahih al-Bukhāri*, Kaherah, Mesir: Mu'assasaṭ al-Mukhtar.

Al-Ha>kim, Muhammad b. 'Abdillah al-Naysābūri (1411H/1990), *Al-Mustadrak 'ala al-S}ah}ih}ain, ta'liq al-Dhahabi*, Beirut: Dar al-Kutub al-'Ilmiyyah.

Ibn Abi Ḥātim, Abū Muhammad 'Abd al-Rahman b. Abi Ḥātim Muhammad b. Idris al-Rāzi (1952), *Al-Jarh wa al-Ta'dil*, 9 jld., Beirut: Dār Ihyā' al-Turāth al-'Arabi.

Ibn Ḥajr, Syihāb al-Din Ahmad b. 'Ali b. Ḥajr al-'Asqalāni (1992), *Fath al-Bari bi Syarh Sahih al-Bukhari*, Kaherah: Dar al-Ghad al-'Arabi.

Ibn Ḥajr, Syihāb al-Din Ahmad b. 'Ali b. Ḥajr al-'Asqalāni (1992), *Hady al-Sāri Muqaddimah Fath al-Bāri*, Kaherah: Dār al-Ghad al-'Arabi.

Ibn Ḥajr, Syihāb al-Din Ahmad b. 'Ali b. Ḥajr al-'Asqalāni (1984/1404H), *Tahdhib al-Tahdhib*, Beirut: Dar al-Fikr.

Ibn Ḥajr, Syihāb al-Din Ahmad b. 'Ali b. Ḥajr al-'Asqalāni (1419H/1989), *Al-Talkhis} al-Ḥabir fi Takhrij Ah}ādith al-Rafi' al-Kabir*, 4 jld., t.t.p: Dar al-Kutub al-'Ilmiyyah.

Ibn Ḥajr, Syihāb al-Din Ahmad b. 'Ali b. Ḥajr al-'Asqalāni (1425H/2004), *Taqrib al-Tahdhib, tahqiq*: Abū Muhammad S}ala>h al-Din b. 'Abd al-Mawjūd, Mansurah, Mesir: Dar Ibn Rajab.

Ibn Ḥazm, Abū Muhammad 'Ali b. Ahmad b. Said al-Zāhiri (1352H), *al-Muhallā*, Mesir: Idāraṭ al-Ṭabā'aṭ al-Muniriyyah.

Ibn al-Jawzi, 'Abd al-Raḥmān b. 'Ali b. Muḥammad (1406H), *al-Ḍu'afā' wa al-Matrukin*, Beirut: Dār al-Kutub al-'Ilmiyyah.

Ibn Mājah, Abū 'Abdillah Muhammad b. Yazid al-Qazwini (t.th.), *Sunan Ibn Mājah, tahqiq* : Muhammad Nāṣir al-Din al-Albāni, Riyad: Maktabaṭ al-Ma'ārif.

Ibn al-Wazir al-Yamani, Muhammad b. Ibrahim (1994), *al-‘Awasim wa al-Qawasim fi al-Dhabb ‘an Sunnah Abi al-Qasim*, Beirut: Mu’assasah al-Risalah.

Mahmud ‘Abd al-Raziq, Dr. (2012), *Asma’ Allah al-Husna al-Thabitah fi al-Kitab wa al-Sunnah*, Kaherah: Syarikah al-Basirah.

Mahmud al-Tahan, Dr. (t.th.), *Taysir Mustalah al-Hadith*, Karaci: Qadimi Kutub Khanah.

Al-Mizzi, Jamāl al-Din Abi al-Ḥajjāj Yūsuf b. ‘Abd al-Rahmān (1415H/1994), *Tahdhib al-Kamāl fi Asmā’ al-Rijāl*, 35 jld., Beirut: Mu’assasat al-Risalah.

Muhammad Abū al-Layth, Dr. (2005), *‘Ulūm al-H}adith As}iluhā wa Mu‘a>}iruhā*, Selangor: Dār al-Syakir.

Al-Qusyairi, Muslim b. al-Ḥajjāj al-Naysabūri (2003), *Ṣahih Muslim*, Kaherah: Dar Ibn al-Haitham.

Tafsir Pimpinan al-Rahman Kepada Pengertian al-Qur‘an. 2001. Ed. ke-12. Kuala Lumpur: Jabatan Kemajuan Islam Malaysia.

Al-Tirmidhi, Abū ‘Īsā Muhammad b. ‘Īsā b. Sawrah (t.th), *Sunan al-Tirmidhi, tahqiq*: Muhammad Nāṣir al-Din al-Albāni, Riyad: Maktabat al-Ma‘ārif.

Wan Kamal Nadzif b. Wan Jamil (2017), *Konsep Layyin al-Hadith Menurut Ibn Hajar Dan Perwayatannya Dalam al-Kutub al-Sittah*, Tesis Doktor Falsafah, Bahagian Pengajian Islam, Fakulti Ilmu Kemanusiaan, Universiti Sains Malaysia, Pulau Pinang.